





續文選卷第三十一

明平原湯紹祖公孟撰

墓誌

陶貞白先生墓誌銘

梁簡文帝

維大同二年龍集丙辰克明三月壬寅朔十二月癸
丑巳時華陽洞陶先生蟬蛻於茅山朱陽館先生諱
弘景字通明春秋八十有一屈伸如恒顏色不變有
制贈以中散大夫謚曰貞白先生遣舍人主書監護
喪事十四日巳時窆於雷平之山若夫真以歸空爲

美道以無形爲貴不知悅生大德所以爲生不知惡
歿谷神所以不歿妙矣哉隱顯變化物莫能測旣而
岫開折石天墜玉棺銀書息簡流珠罷竈九節麗於
空中千和焚於地下仙宮有得朋之熹受學振臨谷
之悲余昔在粉壤蚤逢圯上之術今適元良屢稟浮
丘之教握留符而惻愴思化杖而酸辛乃爲銘曰

無名曰道不歿爲仙亦有元則兼稱稚川遁形解化
自昔同然猗與夫子受籙歸玄梨傳苑吏書因賈船
虎車照景蜺拂凌煙餘花灼燦春澗潺湲鬱鬱茅嶺
悠悠洞天三山白鶴何時復旋

徵君何先生墓銘

梁簡文帝

文範高世玄晏絕倫復有令德遠之與均誰與均此
嗚呼哲人第五肥遁餘軌尚遵司空開學其風不泯
傳茲孝敬曰涕且仁氣高瓊岳心虛谷神括羽儒囿
舟輿席珍旣遊慧水兼引法輪談扇猶在鳴琴尚陳
如何不憖德素長淪寂寥巖穴荒涼渭濱橋曰隻鷄
徐稱酹素余欽夫子風期夙著蓄思含毫傳芳寫譽
沉礎雖貞玄泉無曙

楊都興皇寺釋法朗墓銘

陳後主

洪源遠采傳芳馥蕙君子哲人英芬是繼朱旄旣杖
青組仍曳紉虎戎卸貳貌狄制功可冠軍業非出世
揖彼聲色超此津濟津濟伊何裂斷網羅忍衣蚤記
乘樓夜過航斯苦海涸此愛河若非智士孰寄宣揚
法雲廣被慧日舒光旣推衡櫓自闢金湯夢齊鼓說
應異鍾霜識機知命同彼現病夙心棲遁度脫難竟
化緣已矣乃宅丘穽智炬寂滅顙巖遼復遼復空岑
搖落寒侵弦餘月暗霧下松深香滅窮壠旛橫宿林
切切管清遙遙鼓聲野煙四合孤禽一鳴風淒唳

流急寒生神之淨土形沈終古勒此方墳用旌蘭杜

周大將軍懷德公吳明徹墓誌銘

庾信

公諱明徹字通昭兖州秦郡人也西都列國長沙王
功被山河東京貴臣大司空名高霄漢豈直西河有
守智足抗秦建平有城威能動晉而已也祖尚南譙
太守父樹右軍將軍抗拒淮沂平夷濟漯代爲名將
見於斯矣公志氣縱橫風情倜儻圮橋取履蚤見兵
書竹林逢獫狁偏知劍術故得勇爵登朝材官入選起
家東宮直後除左軍葛瞻始嗣兵戈仍遭蜀滅陸機

纔論功業卽值吳公之在梁未爲達也自梁受終
齊卿得政禮樂征伐咸歸舜後是以威加四海德教
諸侯蕭索煙雲光華日月公以明略佐時雄圖贊務
鱗翼更張風颺遂遠冠軍侯之用兵未必師古武安
君之養士能得人心擬于其倫公之謂矣爲左衛將
軍尋遷鎮軍丹陽尹北軍中候總政六師河南京尹
冠冕百郡文武是寄公無愧焉瀟湘之役憑陵島嶼
風船火艦周瑜有赤壁之兵蓋舳艫艦魏齊有橫江
之戰仍爲平南將軍開府儀同三司都督湘衡桂武
四州刺史遂得左廣廻局轡車反暢長沙楚鐵更入

兵欄洞浦藏犀還輸甲庫雖復戎歌屢凱軍幕猶張
淮南望廷尉之囚合肥稱將軍之寇莫不失穴驚巢
沉水陷火爲使持節侍中司空車騎大將軍都督南
北兗青譙五州諸軍事南兗州刺史南平郡開國公
食邑八千戶鼓吹一部中台在玄武之宮上將列文
昌之宿高蟬臨髮吟鷺陪軒平陽之邑萬家臨菑之
馬千駟坐則玉案推食行則中分麾下生平若此功
業是焉旣而金精氣壯師出有名石鼓聲高兵交可
遠故得艫舳所臨蓋於淮泗旌旗所襲奄有龜蒙魏
將已奔猶書馬陵之樹齊師其遁空望平陰之烏俄

而南仲出車方叔蒞止暢轂文茵鉤膺脩革遂以天道在此南風不競昔者裨將失律衛將軍於是待罪中軍爭濟荀栢子於焉受戮心之憂矣胡以事君宣政元年屆於東都之亭有詔釋其鸞鑣蠲其廛社始弘就館之禮卽受登壇之策拜持節大將軍懷德郡開國公邑二千戶歸平津之館時聞櫪馬之嘶舍廣城之傳裁見諸侯之客廉頗眷戀寧聞更用之期李廣盤桓無復前驅之望霸陵醉尉侵辱可知東陵故侯生平已矣大象二年七月二十八日氣疾增暴奄然賓館春秋七十七卽以其年八月十九日寄瘞于

京兆萬年縣之東郊詔贈某官謚某禮也江東八千
子弟從項籍而不歸海島五百軍人爲田橫而俱歿
嗚呼哀哉毛修之埋於塞表流落不存陸平原敗於
河橋歿生慙恨反公孫之柩方且未期歸連尹之尸
竟知何日遊魂羈旅足傷溫序之心玄夜思歸終有
蘇韶之夢遂使廣平之里永滯冤魂汝南之亭長聞
夜哭嗚呼哀哉乃爲銘曰

九河宅土三江貢賦彼美中邦君之封殖負才矜智
乘危恃力浮磬戢鱗孤桐垂翼五兵蚤竭一鼓前衰
移營滅竈空幕禽飛羊皮詎贖畫馬何追荀瑩永去

隨會無歸存沒俄頃光陰愴悽岳裂中台星空上將
眷言妻子悠然亭障魂或可招喪何可望壯志沉淪
雄圖埋沒西隴足抵黃塵碎骨何處池臺誰家風月
墳塋羈遠營魂流寓灞岸無封平陵不樹壯士之隴
將軍之墓何代何年還成武庫

周故大將軍豳國公墓誌銘

庾信

公諱廣字乾歸邵惠公之元孫豳孝公之長子若木
拂日長蛇委天龍圖幕河之光神鼎連雲之氣六辯
構字五運徵祥是以維嶽降神自天生德凝脂點漆

日角珠庭爲子則名高五都爲臣則光照千里華蓋
中天之峰未階其峻虞淵浴日之水不盡其源歲在
珣車年方竹馬月中桂樹切問能訓石上木生懸思
卽悟年十一孝公薨乳乳在疚孺慕過禮泉驚孝水
竹動寒林三行克宣八翌斯舉大周建國宗子維城
設壇封人分司典命開國天水郡公食邑三千戶元
年授使持節驃騎大將軍開府儀同三司其年四月
授都督秦州刺史孝公久牧汧隴遺愛在人今茲見
撫我君之子豈獨司隸之臺鮑宣累葉丞相之府韋
賢重代二年拜大將軍方衛青之張幕冊重元勲譬

韓信之登壇榮高獨拜武成元年遷都督興梁等十九州諸軍事梁州刺史嶠豕導漾乃濟漢之東流蔡蒙旅平實華陽之西極其年九月改封蔡國公食邑萬戶地接韓城關隣楚障戶封八縣恩深寇恂之功邑啓萬家事極曹叅之賞保定元年授小司寇并戶苔生囚關籥動載酒屬車幸無冤氣觀囚軍府或聽鳴琴二年轉守蒲城都督潼關等六防諸軍事其年閏月遷都督秦渭等十二州諸軍事秦州刺史公亟牧冀城頻藩隴坻豪傑歛手貪殘解卽加以上谷精兵漁陽噪鼓北臨高柳南望長榆匈奴下馬之山貴

相藏酒之谷莫不遠慕威聲遙承風化二年奉詔向
甘州迎皇后有文書手仲子之歸紀裂繻來卿爲君
遂自非名高絕國威被和隣豈得稱族而行尊君之
命四年授柱國大將軍昭陽以功高見用項梁以名
將當官以今方之彼有慙德天和三年授都督陝虞
等八州甘防諸軍事陝州刺史屈產垂棘既有滅虢
之兵王官羈馬非無絕秦之路公以正正鼓旗閑閑
車軌服叛威邊算無遺策但以中外久勞積斯災疾
山川則金走群望賓客則諸侯在門是以請謁承明
言歸湯沐方詢夏郊之祀或辯桑林之崇更除秦州

刺史仍襲父爵幽國公分流之嶺未登晚塞之城空
望太夫人以公羸瘠悲泣相守胸氣交衝奄捐館舍
公頓伏苦寢水漿不入雖王人勸奪瘡鉅愈增母歿
於子子歿於親慈孝之道一朝總集大漸之辰春秋
二十有九四關罷市三軍行哭言尋聽訟猶見寒棠
還顧空營唯餘衰柳謚贈某官禮也六年六月歸塋
於秦州之某原玄甲啓路追論驃騎之功龍旂贈行
深悼東平之遠公亮直惟忠溫恭惟孝居之仁義飾
以禮樂風神機警聰敏精明有似于宮牆無形於喜
愠金版玉策之記枕籍忘疲蘭葉之花之圖膏映必

舉碣石秋雲昭陽落月思風含臆言泉流吻翩翩善
記則阮瑀陳琳荏荏風流則王濛謝朓語其百發弓
絕於猿吟論其百中劍深於鴈陣枚乘之望梁苑不
憚棄官樂毅之求燕路無辭千里至如應變將略雷
電立成帷帳謀猷孫吳闇合有品藻人理之志有清
平天下之心鵬路忽摧龍津遂壅嗚呼哀哉大宰蚤
茂三荆長辭萬始撫養遺孤連枝同氣馬援之誠兄
子義存謹飭王況之事世叔情深愛敬同德比義此
之謂乎乃爲銘曰

御乾從紀乘離作聖白環讓德玄珪受命平一地紐

增輝天鏡傍廕數國前臨七政地屬先登時逢下武
玉璜撥亂金滕光輔衛晉承家邢茅胙土波分建木
汎流玄滬景命寅序徽猷淵塞忠有令圖孝爲全德
山節蒞政桓珪守國瀚海將臨燕山行勒平樂高宴
金華說經論儒壁水親禮明庭相風待賦承露須銘
乘舟向日策馬隨星德舉克明能賢允淑上將授賑
元戎推轂趙失東漁胡亾南牧箭下遼城泥封函谷
袞衣頻露丹旌亟卷約法情推繁辭理遣盜烏懸察
疑蛇立辨人共官園家同野繭繭雲摧景轉風落仞
星裂中台山傾左鎮夏楹舍爵殷階啓殯繆幕躡行

明旂庭引秦川直望隴水分飛山河滿目容衛靈歸
陵圖石馬車畫袞衣小山搖落長林變衰淒愴原照
荒涼宅兆樹密人稀山多路少十里松城千年華表
夜臺方寂窮泉無曉

周譙國公夫人步陸孤氏墓誌銘

庾信

夫人諱某字某本姓陸吳郡人也大夫拓境百越來
庭丞相勒兵三江席卷高祖載爲劉義真長史畱鎮
關中旣沒赫連因卽仕魏臨終誠其子孫曰樂操土
風不忘本也言念爾祖無違此心祖政驃騎大將軍

儀同三司恒州刺史父通柱國大將軍大司馬文安
公匡贊經綸叅謀揖讓名高廣武功重長平夫人七
德含章四星連曜敬愛天情言容禮典九日登高作
銘秋菊三元告始或誦春椒年十有四聘於譙國友
其琴瑟愈恭節儉之心伐其條枚實秉憂勤之德鄴
地登高之錦自濯江波平陽採桑之津躬勞蠶月天
和元年冊拜譙國夫人東武亭之妻旣稱有秩南城
侯之婦還聞受封柱國殿下以名華分照增城峻土
揚旌燹道問政邛都白狼之溪途艱黃牛之坂荔枝
之山地險葡萄之國夫人別離親戚關河重阻夷歌

一曲未足消憂猿鳴三聲沾衣無已是以天厲之疾
遂成沉痾玉瀝難開金膏實遠建德元年七月九日
薨於成都私第春秋二十有一卽以其年十一月二
十二日歸葬長安之北原詔贈譙國夫人禮也殿下
傷神秋月掩淚長松周季直之畱書更深冥漠潘安
仁之詞藻徒增哀怨豈言西河女子獨見銀臺東海
婦人先逢金闕銘曰

芟陵反旆椒山止戈金精據嶺昌閣凌波西遊卿相
東裂山河華亭冠冕穀水絃歌震維徙族燕垂從宦
塞入飛狐關連鳴鴈策預登阜功叅臨澗寶鼎畱名

彫戈餘贊應圖淑令秉禮言歸魚軒馮軾澤雉文衣
明月照鏡仙石支機行雲細起迴雪輕飛北降帝子
南麾蜀守若水旣開靈山已鏤月峽猿啼江神牛鬪
星機北轉日轡西迴陽泉伏氣陰律沉灰鶴辭吳市
鳳去秦臺神光離合燈影徘徊雙流反壑百兩迴旌
少女離位夫人去城帷堂野設帳殿郊營山川奇事
風月無情搖落丘隴荒涼封域樹樹秋聲山山寒色
草短逾平松長轉直節墳方固園陵永植

周趙國公夫人紇豆陵氏墓誌銘

庾信

夫人諱含生本姓竇扶風平陵人魏其朝議列侯
莫能抗禮安豐奉圖功臣則咸推上席外戚列傳既
聞建武之書仲山古鼎或表單于之獻祖略少保建
昌郡公父熾柱國大將軍太宗伯鄧國公孟津大誓
常預同德之臣咸陽違約克贊先登之主並得位入
六府功參八柄夫人有文在手有象應圖榮曜夙彰
徽華蚤茂肅恭以禮受教於公宮言容以德有聞于
師氏及乎進贊君子內主邯鄲琴瑟在堂輜輶是服
長久於節不無秋菊之銘履端於始或有柏蘿之頌
豈止莊姬掩笑楚相知慙定姜問兆齊兵不人武成

二年冊拜趙國公夫人漢王聞立義之婦邑以延鄉
齊侯見有禮之妻封之石窳異代同榮羞無慙德柱
國殿下居若木之一枝在天漢之別派揚旌玉壘驅
傳銅陵南通向日之民東被無龍之國夫人從政月
峽贊德雲門錦濯江波還臨織室山明石鏡卽對粧
樓旣而玉律頻移金爐不變胡香四兩嗟西域之使
稀靈草一枝恨瓊田之路絕天和五年四月三十二
日薨於成都之錦城春秋二十孫子荆之傷逝怨起
秋風潘安仁之悼亾悲深長簾况復仙臺永別無復
簫聲傳母長歸唯畱琴曲七年二月日歸葬於長安

之洪瀆原詔贈趙國夫人禮也雲雨去來旣留連於
楚后光陰離合實惆悵於陳王銘曰

河西斗絕觀津孤起章武賢臣安豐賢仕木樓千仞
金山萬里紹慶邢姨基昌宋子施衿趙北侍姆秦南
絃綰禮數綸狄駢驂義超江汜仁流葛覃玉筐迎鸛
金籠助蠶敬愛純深端莊淑問有光國史無形喜愠
舉案外恭停機下訓馨馥於蘭年華於薜風雨消散
神靈離絕婺女還星姮娥歸月左櫺夕奠高堂朝發
空揚凌波更無廻雪下平曰隰高平曰原西臨火井
北望寒門猶垂雉服尚駕魚軒平原忽矣天道何言

山迴地市路沒滕城松悲鶴去草亂螢生新雲別起
舊月孤明賢墳永式節隴常貞

周儀同松滋公拓跋兢夫人尉遲氏墓誌銘
庾信

夫人諱某河南洛陽人也祖父太師柱國公魏室喪
亂經綸夷阻周朝建國匡翊揖讓圖謀帝系卽有內
外之親分裂山河仍爲舅甥之國夫人容範端莊儀
形淑令六義觀德南風有夫人之詩八卦成形東方
有少女之位姆傳習言公宮教業箴管綿纈佩輓蒞
蘭年十有二出適儀同拓跋兢衣其翟服旣得宗婦

之儀乘其魚軒還從列國之禮標梅三實無闕其時
天桃九華能修其政某年某月冊拜迴洛縣君母金
明公主魏文帝長女春則帝女採桑秋則王姬築館
夫人出入主家遨遊戚里濯龍園苑長門宮殿旣而
膏腴美疢華茂傷年沉痾牀帳蒸離寒暑三世之術
無乏於醫門百草之本徒窮於藥性建德三年五月
七日亾春秋三十昔西河女子值九節之菖蒲東海
婦人得三山之芝草無由再遇悲矣如何卽以其年
十一月十五日塋於京兆之北陵原龜筮告辰丘陵
啓真西臨織女之廟南望閼風之墳嗚呼哀哉乃爲

銘曰

父曰帝師母曰王姬車服不繫江漢無思是生令淑
觀禮敦詩聲超宋于德茂邢姨繼世盛德思賢克舉
奠鴈迎門濡蘋實俎奉盥如事移茵卽序春冰浴蠶
秋機秉杼帝鄉近親帝城近臣濯龍親戚平陽主人
金波迴月玉樹臨春弄玉鳳凰昌榮紫草自此千年
無人得道舜華榮曜飄零何蚤渭水北原平陵故園
纔通谷口卽望寒門吁嗟此地去矣歸魂孟冬十月
長松九年親賓掩淚悽愴何言

周彭城公夫人爾朱氏墓誌銘

庾信

夫人爾朱氏河南洛陽人也若夫陰山表裏衝北斗
之機衡瀚海彌綸直西街之畢昴四時銜火燭龍開
照地之光六月搏風大鵬運垂天之翼由是奄有京
縣遂荒中土車書禮樂三王之損益可知將相公侯
百代之山河不殞祖敞隋儀同三司金紫光祿大夫
岐同金申信臨徐七州總管兵部尚書金城郡開國
公天列尚書之星地標光祿之塞出身萬里知呂岱
之元勲專命一方識劉弘之重寄父休寂隋左千牛
備身朝散大夫齊王府司馬襲封爵金城公大夫稱

代諸侯胙土淮仙致雨仍攀桂樹之山楚客臨風更
入芙蓉之水夫人玉臺貞氣金河仙液蔡中郎之女
子蚤聽色絲謝太傅之閨門先揚麗則彭城公發源
殷伯承家漢相山川氣候彰白武於臯繇象緯休徵
下蒼龍於曼倩三星照夜佇稽鳴鴈之期七日秉秋
坐薦飛皇之兆夫人年甫十八遂歸於我巫山南眺
逢暮雨于瑤姬華岳西臨降明星於玉女動合詩禮
言成軌則晨昏展敬事極於移天蘋藻潔誠義申於
中饋女郎砧石響明月而思秋風織婦機牀聽寒蛩
而催絡緯用曹大家之明訓執宋伯姬之貞節加以

心依八覺理會三空遊智於檀林汎仙舟於法海
幾神獨照默言象而無施空有兼忘束筌蹄而不用
人生天地壽非金石銀臺竊藥想奔月而何年金殿
煎香思及魂而無日以某年月日終於平康里之私
第越上元三年十月二十日合葬於城南之畢原禮
也齊侯寢側杜氏階前對文王之畢原用周公之合
塋偃松千古長無寡鶴之悲文梓百尋還見雙鴛之
集其銘曰

合塋非古周公所存歿生千載棺槨雙魂野曠風急
天寒日昏煙霾杳嶂霧失遙村紀黃絹之碑表對青

松之墓門

思舊銘

并序

庾信

歲次攝提星居鶉首梁故觀寧侯蕭永卒嗚呼哀哉
人之戚也旣非金石所移士之悲也寧有春秋之異
高臺已傾稷下有聞琴之泣壯士一去燕南有擊筑
之悲項羽之晨起帳中李陵之徘徊岐路韓王孫之
質趙楚公子之畱秦無假窮秋于時悲矣况復魚飛
武庫預有棄甲之徵鳥伏狄泉先見橫流之兆星紀
吳亡庚辰楚滅紀侯大去鄢子無歸原隰載馳輶輶

長往甲裳失矣。餘皇棄焉。河流酸棗。杞梓與檇櫟俱流。海淺蓬萊魚鼈與蛟龍共盡。焚香複道。詎歛遊魂。載酒屬車。寧消愁氣。芝蘭蕭艾之秋。形殊而並。瘁羽毛鱗介之怨。聲異而俱。哀怨之徒也。何能感焉。彫殘殺翮。無所假於風飈。零落春枯。不足煩於霜露。幕府昔開。俊賢翹首。爲羈終歲。門人謝焉。及乎東首告辭。西陵長往。山陽車馬永別。郊門潁川賓客遙悲。松路稽叔夜之山廬。尚多楊柳。王子猷之舊徑。唯餘竹林。王孫塋地方爲長樂之宮。烈士埋魂。卽是將軍之墓。昔嘗歡宴。風月畱連。追憶平生。宛然心目。及乎垂翅。

秦川關河斷旅降於悲谷之景實有憂生之情美酒
酌焉猶思建鄴之水鳴琴在操終念華亭之鶴重爲
此別嗚呼甚哉麟亾星落月歿珠傷瓶罄壘耻芝焚
蕙歎所冀鐘沉德水聲出風雲劍沒豐城氣存牛斗
潛然思舊乃作銘曰

風雲上慘舟壑潛移駸駸霜露君子先危紀侯大去
懷王不返玉樹長埋風流遂遠荀卿故縣慶封餘邑
萬里歸魂修門詎入城連武庫山枕盧龍思歸道遠
反塋無從徒畱送鴈空靡長松平陵之東無復梧桐
松聲蕭瑟長起秋風疇昔隆貴提攜語默託情嵇阮

風雲相得有酒如渑終溫且克朝陽落鳳大野傷麟
佳城鬱鬱流寓於秦山陽相送唯餘故人孀機發緯
獨鶴孤鸞閨深夜靜風高月寒生平已矣懷故何期
匣中絃斷隣人笛悲昔爲幕府今成總幃

唐故邢國公李密墓誌銘

魏徵

觀夫天造草昧之初有聖經綸之始原鹿逐而猶走
瞻鳥飛而未定必有異人間出命世挺生負問鼎之
雄圖鬱拔山之壯氣控御英傑鞭撻區宇志逸風颺
勢傾海岳或一丸請封函谷或八千以割鴻溝夏殷

資以興亾楚漢由其輕重懋功隳乎旣立奇策敗於
垂成仰龍門以摧鱗望天池而墜翼求之前載豈代
有其人者哉公諱審字玄邃隴西成紀人自種德降
祉弘道垂風導碧海之長瀾疎閬峰之遙構家傳餘
慶明哲繼軌論文德則弼諧舜禹語武功則經綸秦
漢其餘令望且公且侯垂翠綏拖鳴玉者蓋亦耆舊
未得盡傳良史莫能詳載矣曾祖弼周太師上柱國
衛公祖曜周太保魏公父寬隋上柱國大將軍涼州
總管蒲山郡公金匡周之美呂望愧其嘉謀平吳之
功杜預慙其遠略公渥注龍種丹穴鳳雛降列象之

玄精稟成形之秀氣雲生五色一日千里起家左親
衛府東宮千牛備身趨馳武帳暉映廊廡出入龍樓
光生道路隋文帝精華已竭義不斷恩始開凌長之
源將致覆宗之禍公見機而作謝病言歸優游經史
晦明藏用風塵靡雜賓友簡通交必一時之俊談必
霸王之略尚書令景武公楊素崖岸峻峙天資宏亮
壁立千仞直上萬尋嗣關西之孔子追陝東之姬旦
深謀遠鑒獨步當時公年甫弱冠時人未許景武一
見風神稱其傑出乃命諸子從而友焉金結以始終
之期申以死生之分暨有隋二世肆虐黔首三象霧

塞五岳塵飛妖灾所臻匪唯血落星隕怨譟所動寧
止石言鬼哭轍迹遍於天下徭戍窮於海外冤冤塞
宇宙白骨蔽原野墳壠發掘城郭丘墟萬里蕭條人
煙斷絕公與楚公叶契共拯橫流未息溟海之波幾
及昆岡之火亾自道中竄身草澤奮臂大呼羣雄嚮
起豹變梁楚鳳翔輦洛據敖庾而塞輶轅登太行而
臨白馬九服諸侯四方豪傑或跨州連郡或稱帝圖
王合從締交爭亾秦族者莫不驅茲青犢背彼黑山
擊長轂以雷奔望高旗而電集不期而會者以百千
數遂大開幕府肇啓霸圖敷七德以宣威掩八紘而

取俊鱗羽畢萃草澤無遺於是發人文以化之播仁
義以乘之應時機以鼓之總羣策以決之九野風馳
六合雷駭彈壓趙燕震驚江漢世充甚昆陽之敗煬
帝同望夷之禍化及師殲於黎陽建德稽顙於河朔
七國之地四爲我有五都之所三在域中胡騎千羣
長戟百萬飲馬則河洛可竭作氣則嵩華自飛近無
不懷遠無不肅聲溢寰宇威懾華夷屬人神之主以
天下爲已任荒裔佇來蘇之望遺黎有息肩之所雖
寔下民伊賴然非上帝所臨壯志展於人謀雄圖屈
於天命始先鳴於大樹終垂翅於羣孽乃眷西顧舉

茲東夏載驅周道來謁承明帝曰念功降茲休命上
柱國邢國公拜光祿卿公雖威未振主自爲謀蓋當
世舊部先附多出其右故吏後來或居其上懷漁陽
之憤憤耻從吳耿後列同淮陰之快快羞與絳灌爲
伍負其智勇頗不自安俄屬元帥秦王經營灑洛亦
親承祕策率卒先行旣出鷄鳴之關方次休牛之塞
詔命施號更盡嘉謀公想雲夢之僞遊慮青衣之詐
反心辭魏闕之下志在江湖之上慕范蠡之高蹈追
赤松之遠遊熊耳峰危羊腸經險降吳不可歸蜀無
路短兵旣接修途已窮陰陵失道詎展拔山之力騷

馬不逝徒切虞兮之歌臨陣喪元時年三十有七故
吏上柱國黎陽總管曹國公徐世勣等表請收葬有
詔許焉體質貞明機神警悟五行一覽半面十年雅
善書劍尤精文史輕一夫之勇學萬人之敵至於三
令五申之法七縱七擒之功出天入地之奇拔幟擁
沙之策莫不動如神化應變無窮負縱橫之才遇風
雲之會望紫氣以驤首凌扶搖而振翮摠不召之衆
問獨夫之罪從我如流三分將二遂有囊括四海之
志併吞六合之心旣而神器有歸朝宗天闕率從義
之旅爲勤王之師更望重自疑功高是懼將遠遊以

逃難離途窮而及禍惜乎高鳥未盡良弓遽折敵國
猶梗謀臣已喪天子過細柳以興嗟聞鼓輦而軫慮
雅重事人之節方申詔葬之禮粵以武德二年某月
日塋於黎陽山西南五里之平原禮也故吏徐世勣
等或同嬰世網共涉艱難感意氣於一言託風雲於
千載所恨金發唐代不列元凱之功俱爲漢臣獨漏
山河之誓是以慟深樂布悲甚向雄慮陵谷之推移
勒斯銘於泉戶庶使神遊楚國無慙項羽之臣魂往
齊都不愧田橫之冢乃爲銘曰

如馬唐臣猶龍周史弘道百世邁德千祀帶地深源

極天峻峙玉種逾潤蘭芳不已成形騰氣成象降精
餘慶鍾美惟公挺生少表奇智蚤擅英聲符采發越
志略縱橫隋道方衰始開凌長覩茲兆亂緬然長想
閉關晦迹招弓莫往盤桓利居不嬰世網運居道消
時逢改卜朱旗爰止素靈已哭野戰羣龍馳走原鹿
競窺周鼎爭亾秦族時遭螻屈運偶鳳翔劬勞百戰
經營四方振蕩六合牢籠八荒始開楚霸終基漢王
羣雄並起莫恢王度聖人旣作皇天乃顧爰自東夏
言遵西路來擬竇融寵逾英布爵窮五等位登九棘
帷幄參謀高衢騁力海運方遠圖南未極縱壑擢鱗

系文選 卷三十一 新貴堂
摩天墜翼熊耳失路新安殞身長男喪楚少女畱秦
驚魂靡託反塋何因列樹松楸唯餘故人

袁州叅軍李府君妻張氏墓誌銘

陳子昂

夫人諱某清河郡東武城人昔軒轅錫胤弧矢崇威
畏其神者三百年得其姓者十四族金貂七葉漢天
子之忠臣鼎足三公晉武皇之名相孤卿玉帛世有
其庸曾祖某北齊太常卿徐兗二州刺史天人之禮
位掌于秩宗侯伯之尊寵優於露冕祖某隋汾陰壽
春陽城三縣令襲公侯之瑞屈銅墨之班士元非百

里之才太丘有三台之望父某唐戶部侍郎復亭建
三州刺史尚書北斗始贊於南宮方岳專城終榮於
獨坐夫人卽刺史之第若干女也稟柔成性蘊粹含
章承禮訓於公宮習威儀於壺則夫其窈窕之秀燕
婉之資貞節峻於寒松韶儀麗於溫玉鉛華不御飾
環佩之容浣濯是衣勤黼黻之彩自作嬪於君子主
中饋於家人三千之禮不違九十之儀無慝至乃恭
於奉上順於接下仁孝以承宗祀慈惠以睦閨門則
雍雍蹒蹒必由其道矣嗚呼府君不造邁此閔凶中
年不淑蚤世而殞青松摧折哀斷女蘿之心丹節孤

高終守栢舟之誓而府君食先人之德無厚生之財
夫人狗黔婁之貞闕丹臺之產孀居永日蓬首終年
處貧素而彌堅保幽芳而不昧始府君之逝有四子
焉少遭罔極之哀未奉過庭之訓夫人保持名教終
始禮經既勗之以義方又申之以遠大皆能率由慈
訓克荷家聲箕裘之業載隆燕翼之謀不實非夫淑
明賢德聖善溫良崇婦道之深規弘母儀之至範孰
能昭宣令問若此之盛哉彼蒼不悅殲我眉壽春秋
若干載初元年月日遘疾終於洛州某里之私第嗚
呼哀哉夫人令儀有穆惠問無喧敦雅志於詩書婉

嫺情於琴瑟若乃姆師酒食之儀女工纂組之繁莫
不總制清衷弘宣懿則茂蘋蘩之雅韻叶沼沚之芳
猷雖古稱敬姜詩云淑女論容比德殆無以過穠華
不居松局永閔嗣子某等悲摧欒棘思結寒泉永惟
同穴之儀仰遵歸祔之典以大周天授三年二月日
朔祔於袁州府君之舊塋禮也合塋非古奉周公之
儀墓而爲墳宗仲尼之訓嗚呼鴛鴦之樹眇泣於松
楸鼓吹之山緬然於丘隴原陵何代銘誌無文有哀
黃鳥之詩遂勒青鳥之兆銘曰

詩云淑女君子好逑懿哉令德嘉儀聿修溫容玉映

系之通 卷三十一 新集堂
峻節松楸妙心彤史潔志玄猷昭宣壺則惠穆蘋洲
共伯蚤逝貞姜獨畱莞居蓬首哀深栢舟彼蒼不憖
此夜長幽懷南風之吹棘相北山以同丘青春兮白
日獨昭昭以悠悠

吳東妻周令人墓誌銘

唐寅

令人諱某字某蘇州雙鳳人也本乎公族稱爲周氏
舍勤於趙門推諤諤昌忠於漢廷對期期盛德之後
必有淑人積慶之餘式生良媛令人蕙質外朗不待
學於師氏蘭情內映自能合於女史顰笑亦式纖穠

合度戴嬌淑慎日思古人鍾姬明敏皆稱士女及乎
旭日始旦三星在天乃嬪於崑山吳氏焉夫子宜之
有琴瑟之和舅姑稱之盡桑梓之敬豈惟工深絲素
藝殫絃組且以禮備蘋蘩宜其家室矣年二十有二
以弘治七年四月十七日寢疾而卒凡歸吳氏十有
九旬粵二十八日壬寅塋於興賢里附先塚也夫彩
雲易散玉簪中折灰酒不靈惟睹障中之匣雨鈴興
感但畱巾上之香嗚呼天眷有德委者必壽顧茲懿
行不至遐齡何哉得非天爽其信神食其言歟段婦
高標餘熾獨傷其年少劉妻有德彥升乃述以貞銘

其銘曰

周本姬姓吳乃子國崇其婚媾偶望齊德坤詞著功
周詩咏色旣宜伯姊允飾言容人稱郝法尼談謝風
才溢珠瑤操均寒松天道無知碩人斯喪晉使遠集
秦鑿徒望香斷銀鑪塵流華帳賓寮倍慘山川增愴
里殞淑德夫失良相百歲之後魂其同塋

許天錫妻高氏墓誌銘

唐寅

令人諱真字閨德吳縣鳳凰鄉人其先出自姜姓鄭
有渠彌齊有無平枝布葉分實始宗祧令人蚤值家

艱遘車就聘溫淑閑靜與性俱成歷堂仰侍由房下
撫恭舒金得非儀靡聞及乎傍接妯娒旣云覽妻外
應賓客亦稱顗母年非德永命也傷哉春秋二十九
而卒弘治八年歲在乙卯八月而葬悲夫柳轉當途
鴛鴦惜在梁之翼文旆載道蟠龍失隱鏡之姿居懷
宛轉孤女叫號弔客紛紜僮僕噓嗟於是述德作銘
表於玄廬銘曰

睦睦令人受質自天壺內不驚室外何專壽不因德
福不偏賢芝玉焚摧傷復何言引紼同嗟生順死全
昭茲令名億萬斯年

太學三槐魏君暨嚴孺人合葬墓誌銘

王世貞

君姓魏氏諱續其先指樹而生布柯隴右遂齊皇胄
降葉江左亦稱令甲五世祖某少孤育於從母夫繆
胤畢氏之占冀成外家之相孫枝嬋媽襲而未改王
父奎舍章自怡臯丘之間澹如也以季子恭簡公推
恩爲比部郎章服四品長子真義府君諱學於君爲
父尤有至行薄耕藏名入羣無擾醇醪養德孕穀不
傷君少而秀髻眉弱吐鋒穎府君大異望之樹庭槐
者三曰此所以志也時恭簡公勃宰理窟齋淪誼淵

講席鬱興負笈填委君入陪鯉魚沾

鱸館預占師之祥怡怡惇惇外晦內蔚凡所指授靡
然神解睹鳳毛之煒煌式表丹穴相汗血之奇駿乃
窺渥洼恭簡甚隆愛之謂府君曰是佳兒誰爲配者
擇於甫里嚴氏有未笄之淑廼委禽焉爲嚴孺人孺
人懿善媚秀口無異聲動自裁矩賓筵委蛇閨幃匪
間亾何君以明經補邑諸生有司第藝輒褒然下列
聲問蔚跂爲東南之冠荆寶垂剖而妬玉人郢雪就
調竟摧下里屬先府君捐館舍君哀毀柴立幾於滅
也服余餘哀成瘠移思溫故恭簡憐之令入補太學

郭泰之薄游東京坐傾六館田巴之縱談稷下立席
千人然君素饒酒德浸淫成嗜嗣宗欲澆其磊塊佛
大冀親其形神美疾見膺終以不藥恭簡痛推友于
陋第五之終夕慮深貽厥傷伯道之無天斯人所疾
喪予祝予乃以君伯兄之少子恪爲後茂蘭雖隕於
多露勁草獲表於疾風孺人矢歿自誓茹荼內甘委
心重泉銅跡秘閫乳然在堂藐焉在帷潔滌而前庶
幾漢中之孝丸膽以誨無忝河東之規恪既有室業
復成立曰可以下報乎屬苦末疾怡然委順逝者而
識握手若新君生於弘治甲子九月

靖戊戌七月二十八日春秋三十一有

德丁卯十月初三日卒於嘉靖丙辰三月二十日春
秋五十子一卽恪娶陸氏故太宰公完孫繼娶顧氏
給事中公存仁妹女一適王世貞君始窀穸恪寔襁
褓士禮迫而僅舉幽石闕以無文孺人大歸始舉合
祔追遠則嚴徽辭目慎終則慈音在耳乃謂世貞子
其銘之夫卑不述尊則橋玄胡以見誌內絕稱外則
栢舟胡以聲詩君抱幽玄之德孺人挺孤貞之操俱
以盛年就屈短道齊旌不招永矣丘園之賁秦臺未
絕情哉懷清之志凡在疎戚俱爲咨涕況屬甥館共

於斯文者

於惟魏君梗梓天植滋於禮門不扶而直曾未楣棟
如何顛折翼翼內子從一而終毀質梁寡托盟衛風
存以立孤逝則報公古悲丈夫蘭摧玉折至言令婦
蘭心玉質宛其嫵矣千秋之室

續文選卷第三十二

明平原湯紹祖公孟撰

行狀

故銀青光祿大夫右散騎常侍輕車都尉宜
城縣開國伯柳公行狀

曾祖善才皇荊王侍讀

祖尚素皇潤州曲阿縣令

父慶休皇渤海郡縣丞贈蔡州刺史工

部尚書

汝州梁縣梁城鄉思義里柳渾年七十一

四狀

柳宗元

公字惟深其先河東人晉永嘉年有濟南太守卓者
去其土代仕江左公實後之柳氏自黃帝后稷降於
周魯以字命族因地受氏載在左氏內外傳及太史
公書自卓至公十有一代爲士林盛族著於南朝歷
代史及柳氏家牒惟公質貌魁傑度量宏大弘和博
達而遇節必立恢曠放弛而應機能斷其居室奉養
撫字之誠儀於宗戚而內行著焉其莅政柔仁端直
之德洽於府寺而外美彰焉凡爲學略章句之煩亂

採摭與旨以知道爲宗凡爲文去藻飾之華靡汪洋
自肆以適已爲用自始學至於大成耽嗜文籍注意
鑽礪倦不知游息威不待榎楚儒言經旨夙有聞知
年十餘歲有稱神巫來告曰若相法當天且賤幸而
爲釋可以緩而歿耳位祿非若事也公諸父素加撫
愛尤所信異遽命奪去其業從巫之言也公不可且
曰夫性命之理聖人所罕言縉紳者所不道巫何爲
而能盡之也且令從之而生去聖人之教而爲異術
不若速歿之愈也於是爲學甚篤其在童幼固不惑
於怪譎矣開元中舉汝州進士計偕百數公爲之冠

禮部侍郎韋陟異而目之一舉上第調受宋州單父尉操斷舉措通乎細大絜廉檢守形於造次加雲騎尉秩滿江南西道連帥聞其名辟至公府以信州都邑人罹凶害靡弊殘耗假守永豐令公於是用重典以威姦暴鋪大和以惠鰥嫠毆除物害消去人隱吏無招權乾沒之患政無犯令龐茸之蠹宰制聽斷漸於訟息耕夫復於封疆商旅交於闔市旣庶而富廉耻興焉旣富而教庠塾列焉里閭大變克有能稱遂表爲洪州豐城令到職如永豐之政而仁厚加焉授衢州司馬夫噐宏者耻効以圭撮之任足逸者難局

以尋常之地公遂滅迹藏用遁隱於武寧山羣公交
書諸侯走幣皆謝絕不就方將究賢人之業窮君子
之儒味道腴以代膏粱含德輝而輕紱冕遺榮養素
恬淡如也朝右籍甚有聲徵拜御史公曰君命也安
敢逃乎卽日裝束上道公常好大體不爲細家之迫
速非其志也以疾辭授右補闕不隱忠以固位不形
直以姦名除殿中侍御史賜緋魚袋赴江西與租庸
使議復榷鐵及常平倉便宜制置得以專任和鈞關
石之緒出納平準之宜國利人逸得其要道遷侍御
史克江南西路都團練判官時屬支郡不知連帥之

職公請出巡盡征之地大詰姦謬所至風動其有非常之政裕於人者必舉其課績歸之使府又以文采殷勤歌詠之俾其風謠頌聲聞於他部達於京師而後已改祠部員外郎轉司勳郎中餘如故就拜袁州刺史公於是酌古良牧之政宜於今者宗而奉之考諸理國之說稱於人者承而守之均利器用以致其富昭明物則以教之禮示優裕之德以周惠利緩九賦推廣厚之心以固和慈保萬人明其制量臨長羣吏示之法禁考中備敗無不得其極理行高第朝廷休之召拜諫議大夫充浙江東西道黜陟使將舉其

能政端於外邦也公則修虞書之考績舉漢代之課
第處事詳諦無依違故縱之敗奉法端審無隱忌峭
刻之文時分部所繫於公尤重凌江金海竟吳越之
域皆所莅焉復命稱職加朝散大夫又拜左庶子集
賢殿學士奉翊儲后修其宮政統理文籍紀於秘府
拜尚書右丞直而多容簡而有制去苛削之文而吏
皆率法務弘大之道而政不失中加銀青光祿大夫
遷右散騎常侍涇卒之亂公以變起卒遽盡室奔匿
於終南山賊徒訪公所在追以相印旣及公而問焉
公變名氏以紿之捐家屬以委之賊遂執公愛子榜

審訊問折其右肱而公不之顧卽步入窮谷披草徑
踰秦嶺由褒駱朝於行宮上嘉其誠節不時召見公
頓首流涕累陳計畫賊平策勲賜輕車都尉封宜城
縣開國伯拜尚書兵部侍郎初公名載字元輿至是
奏請改命以滌僞署之汙是歲盜據淮潁方議討戮
宰相以大理評事李元平者有名以爲才堪攘寇拜
爲汝州羣臣望聲徇利者皆曰德舉公獨慷慨言於
朝曰是夫喋喋衒玉而賈石者也王衍誤天下殷浩
敗中軍華而不實異代同德往且見獲何寢之攘時
人不之信也未幾盜襲汝州以元平歸凡百莫不嗟

服焉俄以本官同中書門下平章事登翊聖皇匡弼
大政造膝盡規諫之志當事無矜大之容援下情于
上以酌天心順嘉謨于外用彰君德故致績用茂著
而人罕知之然其章布于外敷聞在下者十一二焉
貞元初上以旬服長人天下理本於是親擇郎吏分
宰於京師外部未幾而人謠大和擊壤之頌歸於帝
力上召丞相告之左僕射平章事張延賞抃蹈稱慶
公俯伏不賀且曰旬服之政固宜慎重然則此屑屑
者特京兆尹之職耳陛下當擇臣輩以輔聖德臣當
選京兆以承大化京兆當求令長以親細事夫然後

宜捨此而致理可謂愛人矣然非王政之大倫也不
知所賀上深然之漢惠悅曹參之言絳侯慙曲途之
對考之前志我無負焉旣而西戎乘間入邑詐以請
盟侍中北平王燧建議許之自公卿以下莫有異慮
公獨陳謀獻畫言戎之詐固不可許竟畱中不下而
前議遂行於是冊命上將莅盟諸戎戎果縱兵逼好
大毆掠而去上召對前殿嘉歎者久之時諫臣有廷
爭陷於訕上者上未之善也公從容候間陳古以諷
所以示寬裕之德招謹正之言詞旨切直意氣勤懇
動合聖聽卒見納用無何工人有以理乘輿服噐得

罪於左右者有司以盜易御物請論如法制初可之
公不奉詔因抗疏曰跡其罪狀未甚指明方春殺人
恐傷和氣上覽之大悅卽原其罪刑官愼恤之事正
於邦典聖君含育之德彰於天下論者難之時上相
與光祿卿裴腆不協候公休沐以御酒或闕陰請貶
之制命旣行公堅執不下請訊支計之吏校其供入
之實原本定罪窮理辯刑而腆竟獲宥克復本職白
志貞有羈勒之勤獻利屢中上嘉其功效特寵異之
方議大用公以爲骨徒雜類出自微賤負乘致寇盜
之招也累疏以聞而止公竭誠盡忠憂勞庶務有毫

忘之疾懇迫陳讓除右散騎常侍罷知政事貞元五年二月五日薨於昌化里終於散地故褒贈不及惟公致君之志孜孜焉不有怠也立誠之節侃侃焉無所屈也故處心積慮博塞之道表於朝端弼違釋回朴忠之誠沃於帝念內有敢言之勇進當不諱之明用能直道自達而無罪悔者也公累更重任祿秩之厚布於宗姻無一屨之士以處其子孫無一畝之宮以聚其族屬待祿而飽傭室而安終身坦蕩而細故不入其達生知足落落如此夫其子恭父慈善行也持循制理能政也直廉潔靜儉德也拒疑獨斷明識

也冒危以扞牧圉大節也犯顏以陳訐謨至忠也有一于此尚宜旌褒矧茲備體焉可以已固當飾以榮號章示後來而故吏遺孤淪寓遐壤久稽彝典罪在宗屬敢用評薦舊行敷贊遺風若乃揚孔氏褒貶之文舉周公懲勸之法徵於誅謚則有司存謹狀

弔文

弔古戰場文

李華

浩浩乎平沙無垠曩不見人河水縈帶羣山糾紛黯
今慘悴風悲日曛蓬斷草枯凜若霜晨鳥飛不下獸

挺叅羣亭長告余曰此古戰場也常覆三軍往往鬼
哭天陰則聞傷心哉秦歟漢歟將近代歟吾聞夫齊
魏修戍荆韓召募萬里奔走連年暴露沙草晨牧河
冰夜渡地濶天長不知歸路寄身鋒刃膈臆誰訴秦
漢而還多事四夷中州耗斁無世無之古稱戎夏不
抗王師文教失宣武臣用奇奇兵有異於仁義王道
迂濶而莫爲嗚呼噫嘻吾想夫北風振漠胡兵伺便
主將驕敵期門受戰野豎旄旗川迴組練法重心駭
威尊命賤利鏃穿骨驚沙入面主客相搏山川震眩
聲折江河勢崩雷電至若窮陰凝閉凜冽海隅積雪

沒脛堅冰在鬚驚鳥休巢征馬踟躕繒纈無溫墮指
裂膚當此苦寒天假強胡憑陵殺氣以相剪屠徑截
輜重橫攻士卒都尉新降將軍復沒屍填巨港之岸
血滿長城之窟無貴無賤同爲枯骨可勝言哉鼓衰
兮力盡天竭兮弦絕白刃交兮寶刀折兩軍蹙兮生
歿決降矣哉終身夷狄戰矣哉骨暴沙礫鳥無聲兮
山寂寂夜正長兮風淅淅魂魄結兮天沉沉鬼神聚
兮雲羃羃日光寒兮草短月色苦兮霜白傷心慘目
有如是耶吾聞之牧用趙卒大破林胡開地千里遁
逃匈奴漢傾天下財殫力瘁任人而已其在多乎周

逐獫狁北至太原旣城朔方全師而還飲至策勲和
樂且閑穆穆棣棣君臣之間秦起長城竟海爲關荼
毒生靈萬里朱殷漢擊匈奴雖得陰山枕骸遍野功
不補患蒼蒼然民誰無父母提携捧負畏其不壽誰
無兄弟如足如手誰無夫嬪如賓如友生也何恩殺
之何咎其存其沒家莫聞知人或言將信將疑怕
怕心目寢寐見之布奠傾觴哭望天涯天地爲愁草
木淒悲弔祭不至精魂何依必有凶年人其流離嗚
呼噫嘻時耶命耶從古如斯爲之奈何守在四夷

弔屈原文

柳宗元

後先生蓋千祀兮余再逐而浮湘求先生之汨羅兮
擘蘅若以薦芳願荒忽之顧懷兮與陳辭而有光先
生之不從世兮惟道是就支離搶攘兮遭世孔疚華
蟲薦壤兮進御羔裘牝鷄咿憂兮孤雄束咮哇咬環
觀兮蒙耳大呂董喙以爲羞兮焚棄稷黍犴獄之不
知避兮宮庭之不處陷塗藉穢兮榮若繡黼棖折火
烈兮娛娛笑舞讒巧之嘒嘒兮惑以爲咸池便媚鞠
恧兮美愈西施謂謨言之怪誣兮反寘璵而遠違匿
重痼以諱避兮進俞緩之不可爲何先生之凜凜兮

厲鍼石而從之但仲尼之去魯今日吾行之遲遲柳
下惠之直道兮又焉往而可施今夫世之議夫子兮
曰胡隱忍而懷斯惟達人之卓軌兮固僻陋之所疑
委故都以從利兮吾知先生之不忍立而視其覆墜
兮又非先生之所志窮與達固不渝兮夫唯服道以
守義矧先生之惻惻兮滔大故而不貳沉璜瘞佩兮
孰幽而不光荃蕙蔽匿兮胡久而不芳先生之貌不
可得兮猶髣髴其文章託遺編而歎喟兮渙余涕之
盈眶呵星辰而驅詭怪兮夫孰救於崩亾何揮霍夫
雷電兮苟爲是之荒茫耀姱辭之曠朗兮世果以是

之爲狂哀余衷之坎坎兮獨蘊憤而增傷諒先生之
不言今後之人又何望忠誠之旣內激兮抑銜忍而
不長芊爲屈之幾何兮胡獨焚其中腸吾哀今之爲
仕兮庸有慮時之否臧食君之祿畏不厚兮悼得位
之不昌退自服以默默兮曰吾言之不行旣媮風之
不可去兮懷先生之可忘

弔申徒狄文

李夢陽

覽洪河之吐翁兮洵欲濟而無杭物有離而不回兮
勢有激而難當劇厥人之抗行兮羗自沉而弗疑恬

齊志以長畢兮庶聞者其猶悟之彌六合以設弋兮
鸞鳥騰而不反蛟龍沕以避害兮惟恐去之弗遠不
吾知其亦已兮何荃之忽焉而莫斯睹監四方以求
索兮孰聘美而釋女曰羣汶汶以滄濁兮班予馬莫
之適也衆披離以障之兮又入而莫之白也進惴惴
余瞿遽兮固不若死之爲安寧負石以墜河魚之腹
兮孰忍利菑而盤桓竭誠信以諫君兮反罪過又謂
欺惟堅僻之類忠兮任飛廉而不疑余固知儼媚之
能周兮硜秉質莫之移也介瑰處而無營兮又衆人
之所哈也旣謂干爲忠兮胡又附雷開與惡來旣曰

切人微兮曷不委曲而導之悲時俗之顛倒兮先生
獨遭遇乎此時燕雀烏鵲噪堂階兮鸞鳳出而見縻
曩余知材朴之爲崇兮廼強而不謂之信然苟作善
降之祥兮彼梅伯又何以顛捐規矩以改錯兮斯固
時之態也荃旣與彭咸齊名兮亦何必怨此害也鬱
終古其侘傺兮瞽悒悒之不可平循階岸以邇迴兮
戒艸船余忤營汴河流以投辭兮氣紆結而填臆慨
往后者迷誤兮社稷顛而用屋重曰昔有大夫曰申
徒兮懷瑾弗展負石投河兮冤抑內憤靈泚濫兮湍
瀨礚礚愁人心兮忠回倒植固庸態兮嗚呼先生女

又何懟兮伯夷子胥與爾爲類兮

弔董相文

袁袞

江都有董相祠焉余謁而悲之作賦以弔其詞曰

余有事于江都兮敬謁董相之故祠悼哲人之遐烈
兮獨慨慷以申辭何夫子之純懿兮生不逢夫休時
黃虞日遠兮禮法敗衰弦歌不陳兮譎詐相欺秦肆
并吞兮燔燒書詩周孔道墜兮異說恣睢漢興馬上
兮陋習未除叔孫小器兮又何制作之能爲猗夫子
之中庸兮卒潛心於下帷綜羣籍之華實兮宣六藝

之精微躡游夏以升堂兮抗孟荀其金馳發與義於
天人兮王道粲其綱維彼武帝之多愆兮徒仁義之
外施表章經術兮何獨棄此大儒豈斯文天喪兮實
公孫其蔽之兩相驕王兮匡王禮儀虎口幸脫兮終
身擯遺貪人敗類兮讒言罔極忠信弗臧兮仁賢杜
塞悲士不遇兮撫遺文而太息蓋自古已然兮士入
朝而見嫉駑馬充棧兮騏驎困於下勒幽莠盈疇兮
嘉禾萎而弗植文軒不知御兮敝輿是歸問姝嫫母
兮妍媸眩惑吳干龍淵寧弗利兮謂不如鉛刀之斷
擊濁世潛焚兮又孰能遠夫姦慝昔晏嬰之辯智兮

尼父輟封而受厄姬文之拘囚今崇侯構其仇隙伍
員之殞首兮太宰進其僻說三閭之沉淵兮由子蘭
之嬖溺韓非斃于說難兮李斯爲之讒賊嗟賈生之
通達兮曾弗容乎絳灌宜夫子之於公孫兮沉下僚
而削迹

弔淮守張君文

并序

皇甫汈

淮守張君守約少以楚材挺爲周楨漸翼鴻達蚤膺
龜組單車入境仁風被於初蒞家糧自運苦節堅於
素履使東海臥治假以歲月則南陽坐嘯殆其庶幾

亾何蒼頭構厲白刃俾胸奄以循良之身陷於臧獲
之手嗚呼痛哉夫習在難養患生易忽如得其情則
異類之感可通於肉骨苟失其道則萬乘之尊不畜
於臣妾是故奸宄發於牀第而寇胡生於衽席詎獨
子密不義彭公昧於幾先中書寡恩顏氏載以誠後
而已此古人所以守黑於淵魚智士所以納汙於蜂
蠆也詩稱肅肅在宮之容異焉易繫嘻嘻閑家之節
隳焉寬猛相濟威愛厥克範斯存矣極而論之當伯
廣州之役非同申池之怒便奴貰酒之忿異乎鵠亭
之貪何發之暴且慘也夫弑逆行於二千之吏禍變

起於股肱之郡是曰人妖匪由天作之孽曾是在位
罔恤震隣之咎哀哉先是客曰守居嘗鞅鞅如不欲
生蓋亾徵焉朱季強直以自遂杜陵慨慷而請椽守
不能然則耻之武夫憑寵而作威少年據津而黷賄
守不能禁則耻之關吏囁嚅則終童棄繻亭尉沉湎
則故將止宿乃使利賓之士懷懟而越疆載馳之夫
望風而迴轂守不能振則耻之志乖政闕氣沮神靡
然後隙開釁作至悲震外戶血濺同官方且指掌鳴
心瞋目示意亦晚矣室乏窈窕之御囊無金玉之藏
命陳於歿友愛子未遑託人寧不痛哉余與守也

交非平生罕叔向亭衣之酬如此邂逅有徐君寶劍
之盼茲於返國望嶧山而興嗟迺淮流而出涕遂獻
弔云爾

慨斯人之委化兮吉凶昧於所研傷中道之天閼兮
匪獲考於天年春叢摧於秋荼兮鳳鳥繫於鷹鷂胡
君侯之不競兮身旣沒而名湮負明哲之雅訓兮禍
自召其奚愆登昭丘而想魂兮望洞庭而抽思表素
旌於千里兮告巫陽爲我招之謂江蘋其可薦兮悵
皇蘭之焉貽苟桐鄉之足葬兮又何必遠從乎湘纍

弔夷齊文

并序

王世貞

盧龍故孤竹也城西有伯夷叔齊祠吳人王世貞奉
使過此酌水酹焉而爲之辭

日子奉輜以東逝今束馬放乎令支山嶺岼而嵬嶪
兮衆草質靡而條緯俞隄道余於卑耳兮武夫磷磷
其參差曰青帝之握樞兮頓改煦沍寥而懽悽玄宮
承雲而靈靈兮僉告余二子之所都羗回慮以返照
兮漣漣踳靡而內疑足次且欲卻兮又雀躍而前趨
段舍光劇余之素兮挽清冷使濯余之歲褭招沆瀣
以醴醴兮裊朝霞以爲餽餽嗟玄冥之竅機兮噫噫

拊歌之懽愴受哀絃於太娥兮涓延和之以清商靈
蕭蕭而若睹兮冀回飈燭乎微躬又惝恍其不可卽
兮掌夢疏帝以奚從眺孤竹之亶曼兮台要靈以故
祲生剽舉而脫屣兮寧鬱鬱處彼幽方溟波委輸濊
貉兮箕蒙難而延宗靈庶偕以翔游兮語侏離而不
可通北海決漭靈所辟兮受淳漓使不得寧將岐豐
沃以愉兮靈又薄周德而莫宮諸毘綿延具區兮太
虞夷猶於其旁羗德配而耦娛兮靈謂狎附乎周盟
陂陀首陽忽靡孳兮益薇以荃之芬芳靈聞闔而下
臨兮將綬駕以憇息掌夢申申以表誠兮豐隆臯而

來假霓車殷殷以翩繽兮皎雙鴻之次翼匪寶璐而
陸離兮舍籬芷以彌馥介九賓而見予兮祝史要予
以靡忒伯從父以成命兮叔違親以成德俶舍君以
明志兮旣殉主以明極昔巢許之讓皇兮托勲華而
稍佚尹五就而拯塗兮愀然面故主以惶惓謂題跂
以歿名兮莊任誕而廢節遷曉曉於驥尾兮嗜微聲
之有托彼纍修辭而求白兮卒牢慙沈乎湘澤繹鄒
人之無怨兮廼從容於天則世滔滔而悲涌兮戰伐
莽其相仍顧蒿目以揆攬兮競含沙而蠱光騶虞草
以伏食兮於菟誇咀夫衡生陽鱗之鬻纖鱗兮偃蜓

神龍以自矜靈旣悼農虞之忽沒兮氓躑躅而殷慕
愧突梯之苟容兮將捐足乎靈御胡司命之不晰微
兮抑鋪糟以昏驚盼媼娥之要渺兮確濁軀而不反
顧

祭文

祀魯山神文

梁邵陵王綸

文曰敬奠魯君之靈竊以首山鬱律表二叔之清風
趙國隱淪擅三公之靈迹北坂祠城流光夜起東嶺
叢室甘雨晝零故能徵應不褻介福無爽金壇玉宇

是衆妙之遊遨丹崖翠幄信靈人之響像霓裳虬蓋
轉日車而兢前駕象乘豹載靈旗而總集江妃漢女
含睇來趨湘娥洛嬪宣言在側鳴璆撫劍浹席徘徊
絳節陳竽滿堂繁會奠椒懷精之歡傳芭代舞之樂
桂精溢於羽樽蕙肴盈於蘭藉旣醉旣飽景福攸同
不震不騰神保是格魚鼈之薦已畢慶報之澤攸先
願化昌而俗阜禪多祐之在旃同匪石之無轉欣滯
穗之有年惟東皇兮戾止等南山而不騫

祭夫徐敬業文

劉令嫺

維梁大同五年新婦謹薦少牢於徐府君之靈曰惟
君德爰禮智才兼文雅學比山成辯同河瀉明經擢
秀光朝振野調逸許中聲高洛下含潘度陸超終邁
賈二儀旣肇判合始分蘭賢依德乃隸夫君外治徒
奉內佐無聞幸移蓬性頗習蘭薰式傳琴瑟相酬典
墳輔仁難驗神情易促電碎春紅霜雕夏綠躬奉正
衾親觀啓足一見無期百身何贖嗚呼哀哉生歿雖
殊情親猶一敢遵先好手調薑橘素俎空乾奠觴徒
溢昔奉齊眉異于今日從軍暫別且思樓中薄遊未
反尚比飛蓬如當此訣永痛無窮百年何幾泉穴方

同

祭荊州刺史陰道方文

魏收

維太昌元年十二月庚申朔越十二日辛未友人鉅
鹿魏收謹以清酌少牢之饌敬祭於荊州刺史陰君
之靈嗚呼哀哉惟君世載不殞英聲在茲風流有屬
自爾弘之孝爲行本忠實身基旣言斯立罄禮窮詩
器則清賞才惟英博於暢風雷蕭條丘壑顧言朝市
忘懷淡薄比契沉冥均情寂寞往塵守官及爾同僚
瑱簾合韻琴瑟俱調丹墀踵武清道齊鑣跡淪閑曠

心共津濠乃春平生相忻同趨殷勤宴喜流連辭賦
溘矣不追長違世務詠歌徒在音徽空樹昔猶肢體
與子裘裳今其往也生死殊方形骸何促天地何長
申茲沃醑贈以哀傷嗚呼哀哉

受命祭王僧辯母文

王褒

維爾世基武子族懋陽元金相比映玉德齊溫旣稱
女則兼循婦言書圖鏡覽辭章討論教貽俎豆訓及
平原楚發將兵孟軻成德盡忠資敬自家刑國顯允
其儀惟民之則反命師旅旣修我戎補茲衮職奄有

龜蒙母由子貴亶爾斯崇嘉命允集寵章旣隆居高
能降處貴思冲慶資善始榮兼令終崦嵫旣夕蒹葭
蚤秋奔駟難返衝濤詎畱背龍門而西顧過夏首而
東浮越三官之遐岳經三江之汎流鬱鬱增嶺浮雲
蔽虧滔滔江漢逝者如斯銘旌故旄字毀遺碑卽虛
舟而設奠想徂魂之有知嗚呼哀哉

祭處士仲長子光文

王勣

歲月日隣人王勣謹以魚醴之奠敬祭仲長先生之
道若昧進道若退鳥飛知還龍亢必悔嗟嗟

夫子理融其內不忤不求無憎無愛古人有言微妙
玄通藏用以密養正以蒙嗟嗟夫子允執其中不見
其始孰知其終蕩蕩心跡悠悠默語周覽人事退居
河渚何去何從誰棄誰與聊同聚散亦均寒暑大矣
夫子其生若浮至矣夫子其歿若休鄉黨不懼朋友
不憂素琴猶在黃經尚畱老萊不婚梁鴻難偶筵無
饋奠室無箕箒嗟嗟夫子豈圖其後金玉滿堂莫爲
之守凡我故人素服臨旃葛巾從窆桐棺以遷墳不
易壠坎不及泉苟無怛化於何問天道性旣喪仁義
鋒起祭非古也禮之爲始吾從其俗敢告夫子清樽

薄奠神其歆止

祭亾友柳子厚文

韓愈

維元和十五年歲次庚子五月壬寅朔五日丙午韓
愈謹以清酌庶羞之奠敬祭於亾友柳君子厚之靈
嗟嗟子厚而至然耶自古莫不然我又何嗟人之生
世如夢一覺其間利害竟亦何校當其夢時有樂有
悲及其既覺豈足追惟凡物之生不願爲材犧罇青
黃乃木之災子之中棄天脫馬羈玉佩瓊琚大放厥
富貴無能磨滅誰紀子之自著表表愈偉不善爲

血指汗顏巧匠旁觀縮手袖間子之文章而不用
世乃令吾徒掌帝之制子之視人自以無前一斥不
復羣飛刺天嗟嗟子厚今也則亾臨絕之音一何琅
琅徧告諸友而寄厥子不鄙謂余亦託以歿凡今之
交觀勢厚薄余豈可保能承子託非我知子子實命
我猶有鬼神寧敢遺墮念子永歸無復來期設祭棺
前矢心以辭嗚呼哀哉尚饗

祭熊士選文

李夢陽

仲夏之交我舟南邁衝沙改路浩浩江瀨顧瞻劍浦

有墳山阿慨思哲人攬涕滂沱惟斯哲人志超美心
如玉如金英其德音豸巍於冠立朝之端如鷺戢翰
鳥棲弗安聯裾企珂喟昔京室晨遊繼燭宵吟見日
形忘道孚歿生膠漆妖祲中昏塌翅各歸天清地寧
重離再輝我乎南來哲人玉頽蕙零松摧不見顏儀
見此夜臺絕絃爲誰掩袂徘徊百身願贖返魂無丹
巨川滔滔林原盤盤車停馬駐孰知我歎尚饗

祭李于鱗文

王世貞

隆慶四年八月十九日河南按察司按察使滄溟

李先生于鱗卒于苦次其友人山西按察司按察使
孤子王世貞聞計之一日不及爲位而以家艱歸至
明年之三月壬戌朔哀毀小定乃始能爲詩百二十
韻以哭之又爲文一章絮酒炙鷄裹糧授其僕之濟
上而告先生曰嗚呼惟子文章珠藏玉府示世模楷
爲明粉黼獨立熙臺子鼓余舞炳烺長夜追琢萬古
余所心悲鬱曲齟齬千二百言亦足以吐其未竟者
酹而告汝昔署爽鳩從若風虎爲郎序遷不隔跬武
清霜晝絜白日宵炬子前而逝余亦東邁高揭二華
峩峩岱泰黃河其間烟一衣帶玉女騰翕海若橫毗

子之挂冠鳳矯鴻騫余嗣解組屈蠖哀蟬清泌衡門
其跡則然所不接席徂垂十年聖人中興纁帛交賁
子時幡然顧我色喜當爲女先女其強起余謝不可
子曰母爾疇族女讐疇燭女幽得不思報節士所羞
女以佚歸造物所仇雪涕而冠寔惟子謀旬宣于浙
從子之後汴繡子被晉斧余授太白配月俯視列宿
雲物睥睨風雲倂憇子之喆妣悠然見遺扶服修途
弔影總帷小人有母能不攢思美疾朝聞夕而拂衣
奎壁矚翳滄波竭涸忽傳子耗旣疑且愕曾未回睫
永禍亦作髓淚駢枯肝腑寸鑿嗚呼哀哉人生鮮懽

惟事父母生我知我爰及朋友一旦盡矣膚立同朽
惟余與子匪但三益薄祿微聲以建休戚凡子先驅
余必偕值子今溘然視我若捐余獨何恃而能久全
余復何心而游世間子困尸讒余困人言存者受憎
歿者受憐嗚呼哀哉惟昔濟上坐而丙夜執手浩歎
誰爲來者尼聃睽則軻周分駕邈爾漢季爲兩司馬
不聞揚扆以紹謨雅蘭金協契山水齊徽惟余二人
開闢所希浮生如寄胡能不歸金石可泐榮名庶幾
言猶在耳其人已非嗚呼哀哉子之遺孤駒而汗血
子之遺編家傳白雪有承相在戚若昆弟二三友生

其進未已素車雖杳斑管婁紀人誰無歿子歿可矣
嗚呼哀哉尚饗

再祭李于鱗文

王世貞

嗚呼自子之歿僅四改歲子之遺言四馳遐裔國秀
獄靈珠叢玉萃辭百其家翳子是最走北地壘衡揭
赤幟當子鋒者疇不辟易唯是屬文以瑜來擿謂若
龍蛇天矯伏匿殷彝夏敦欵不易識雖則不識蒼然
其色子之生存目無萬古謂子萬古衆未子許謂子
能不予廷不聞曹劉嗣業盲腐專至且鮮兼工

獨汝以此蓋棺亦可矣天子書之行卷三十餘我不敢秘亦不敢居爰櫛其梓以授兒駒薄有椒漿附言區區帝省人文上宰斯篤嶷嶷伯玉入領樞轂吳徐息搏分贊外服司僕之寄借及不穀所謂小美秩宗攸屬凡子所急靡不來復唯子兒駒尚蹶文戰魯衿未收泌饑猶戀下蔡銜哀總帷罷綵素魄心折清霜髮變嗚呼哀哉念子支牀余方薄游道遠且難莫挽霓輶生慙中散灰愧南州長些大招以比吳鉤悠悠古今旦暮之期後子而生獲奉差池偶後子歿亦復幾時不晦者心不朽者辭嗚呼哀哉

祭宗子相文

王世貞

維隆慶二年戊辰秋七月戊申朔越二十四日辛未
友人吳郡某謹以斗酒炙鷄哭告於故宗君子相之
靈曰嗚呼禮在朋友不哭宿草子之逝矣其草九天
胡爲過之使我心擣維昔龍蛇寔在庚申予鍛於羅
以歿美君君未歸土予始稱人其往則遐其痛則新
嗚呼哀哉長淮北帶大江南襟中爲巨漚涵珠毓金
有宗君秀發藝林應籟長鳴萬竅俱暗螳觀一世
千古鞭齊扶梁出風入雅笑謂濟南齊盟狎主

獨創力排衆許是時相君耽耽吾曹屠裂詩書
烹命騷君辭司封閩藩是勞務屈夙好振其厭射
時維歸師若豕奔佚君積其牙奄爾惕息民母逐兵
兵母逐敵續之粥之我嚴我慈緩帶褒衣儒而將之
遂遷學官既吏而師鳩音來柔左矩右規其言孔布
其身不作斗隕中霄峰摧半獄甓社沈光延津化躍
廣陵絕絃七閩蠡鐸嗚呼哀哉既奪其年又斬其後
君有高堂誰服左右君有遺編誰與爲守豈乏令昆
豈乏哲婦孤魂異域靈樞京師漆燈久湮黃腸欲隳
羣鬼有托君獨疇依人生至此天道何知嗚呼擲筆

之章精光燁然君實騎龍游崑崙巔我敘君詩比於
青蓮其以君傳億千萬年余旣奚悲君亦奚怨嗚呼
哀哉尚饗

祭吳峻伯中丞文

王世貞

嗚呼峻伯昔司爽鳩我實佐公蘭芬漆投赤幟稊文
丹鉛索丘丁戊之交式遏東土公寔繼予以誨齊魯
方舟孟諸金軌梁父霆霹下來霜霰紛如世有太行
成蹟公驅飲恨河梁飛思天外投讒畀豺以爲余快
歷天臺仗節鬼方六徂暑寒鵬騫鵠翔謂不仇予

三拜郵書手跡漸非心期未疎白日靡恒或照或孤
公跪我起夫豈異途嗚呼峻伯人之出處如雲舒卷
何足深語季來治吳日接杯俎顧謂王子伯實眷汝
予茲藩越將公是篤逶迤清茗凌厲天目忽枉季音
遂壞梁木雪涕懸河流噫震陸嗚呼峻伯公才曷倫
其晉右軍簡貴清真縱橫翰墨鬱蟠經綸分甘何樂
誓墓何辛六月少息竟辭寥廓公之大節如水玉琢
桃李霄漢松筠丘壑酹公此辭九京可作嗚呼哀哉

祭李伯承尚寶文

王世貞

嗚呼齊魯文學蓋出天性公登上第肄棘寺政其於
歌詩業已彪炳余齒最劣托載末乘公不余少有唱
必應余樸汝削汝裝余鏡睥睨一世揚扨千春天寔
妬之公出邑臣余旣失公而得于鱗謝生廁焉皆公
邑人吳駢宗徐楚僅國倫表東海風被京洛塵下猶
大曆上則先秦公稍晚收爲司農屬與四五子杯酒
徵逐調不必諧當心則伏栢梁徵和平津館穀遂叅
法從尚帝璽轂余與于鱗或使或牧岱宗一角大
湖一曲公倦長沙霜風淒其歸歌濮上春雪霏微憂
玉敲金少女色絲于鱗不吊誰當鷄尸大國之賦公

其任之亦有勾踐倔強江淮川途阻修鱗羽沈飛三十餘載曠然音徽間有酒客過履道里謂公儼如香山居士其貌逾壯而辭甚綺四部之傍治園稱此木藥緋桃文瓜縹李蠻肢素口珠綠綃紫令色曜日韶音媚耳名位小遜齒則與埒遺編百帙等膾羣舌造物所靳佛界亦缺伯道之哀今古同轍俯仰塵代渺身轉孑絮釀臙肉以申遙訣余衷聊寫敢必公餒嗚呼哀哉

祭汪文學文

汪道昆

嗚呼哀哉茂陵倦游長沙官薄亦覲昌輝邁此焚瘞
吁嗟先生洵美且碩高距擅場大雅可作丁年任俠
節慕朱公存老夷門結客屠中周南削迹脫躡素封
言歸舊服北面儒宗乃睠神臯投趾天目禹穴窮探
具區肆矚陳寶收華和珍韞積長者下車髦士推轂
爰自末路作貢澤宮周游鄒嶧允陟岱宗燕臺購骨
易水歌風躡屩金馬獻畫盧龍乃召公車秦厥長技
天子曰都睹茲鉅麗煌煌上京濟濟良士往哉汝諧
歟敷敘事桓桓直指戾止宮牆薦紳有楚籩豆孔將
若操矩矱爾授圓方彼都有造繫爾之良徙倚橋門

屬厭蔬食嫖節翩翩英聲籍籍常伯分庭相君下席
同氣雲從石交景集華顛朝市困翼天衢曳裾華閥
撫劍脩塗濡首胥溺卷舌罔呼獨行負俗風於懦夫
七稔課功百里奮鐸胡宦之拙胡地之惡涿鹿奧區
我心孔樂習靜蓬戶濫巾雲壑部符甫下天命難謀
云胡豎子殲我吉人夷體傳舍歸骸私門悲纏鄉曲
悼動宗祊嗚呼哀哉瓦缶喧豗鍾呂委歇唯公嗣徽
逢時之闕窮愁著書聊以卒業芳猷永謝令緒中絕
豈無牖下餘巾待期蕭蕭哀挽望望靈輜戒塗郊外
卽安溼西來芳可述往駕莫羈嗚呼哀哉

祭馬少保文

王世懋

嗚呼太華地拔黃河天垂紫氣鬱盤三百年來光啓
宗臣實惟我師麟經赤幟虎觀青藜濬哲維皇甘
盤是資砥礪若金黼黻如絲我皇龍飛師臣是急
乃秉秩宗以及爰立直方而大寬弘以執義色斯形
百僚是挹帝曰師臣大勛用集譬彼井渫方需其
汲天胡不辰絕我鼎鍾扶曳而朝卒瘁厥躬螭頭掩
色箕尾歸空天王撤扆國人罷春砥柱途流削成
摧峰秘器東園飛旄玄宮嗚呼哀哉昔在石渠某也

無似辱公善誘循循再禩實稟餘訓爲周柱史在三
之義庶幾終始人之云亾誰瞻誰視瞻視維何關西
夫子嗚呼哀哉道愧康成絳總去目痛深兮曩西州
絕足豈無門人衰經視玉我獨何人不寢而哭江關
畱滯峭田遐矚椒漿萬里生芻一束嗚呼尚饗

祭梁思伯文

王世懋

嗚呼金石難渝風流易散鼎鼎百年多睽爲患茫茫
大輿誰成爾知亦旣知之誰復携之嗟我思伯其生
寔尊博學居才太師之孫少長墨卿晚耦筆耕藝圃

翺翔詔林西輕發爲餘燕虎頭丹青旁及尺牘孟公
坐驚家不畱儲門多長者慨慷矜諾名聞天下疇謂
世祿旣魚亦雅伊昔追陪蓮池竹林樽前白雲坐上
南金揚摧風騷標映古今匪我能締惟子有心王臣
干征言還在嶺跂予來歸脂車旣整惜彼二豎胡然
爲梗萬里咫尺百年俄頃嗚呼哀哉友道實難物情
倦常有懷楊生况也投荒誰能振頽我思鄭莊望而
不見九原茫茫昔在先朝公實擅美及我忘伯代興
繼軌惟二梁生永嘉正始公實濫先子又隨逝羅浮
兩山其色有瘁嗚呼哀哉戰身萬事剖袂千秋丹青

色在金石聲流其人則往零落山丘燕市歲時良朋
集送臨風御觴陶月吟諷每一尋往啾然色動四坐
無聲人失其重易水淒其大嶺岩巖絮酒弗躬楚些
難招械辭一慟以告石交子而有知鑒我心勞尚饗

糸ノミ

卷三三二

三ノミ

糸ノミ







